

դիւրին և հաճելի դարձնելու համար, վերջում աւելացրինք յատուկ անունների մի ցանկ ուսումնասիրողի գործը դիւրացնելու համար:

Սոյն դիտողութիւններից յետոյ աւելորդ չենք դատում յիշել մի կարևոր պարագայ ևս: Ճիշտ է, որ, ինչպէս ընթերցողը կը տեսնէ բուն իսկ հրատարակութեանս ընթացքում, մեզնից առաջ ուրիշներ արդէն ուշադրութիւն դարձրել են ձեռագրիս վրայ և օգտուել նրանից: Դրանցից յիշատակելի են յատկապէս նախ պր. Ս. Լևոնեան, որ Աղթամարի կաթողիկոսութեան պատմութիւնը գրելու համար արտագրել է «սոյն գրքիս կարևոր մասերը», և երկրորդը՝ Օրմանեան Սրբազան, որ, օգտուելով նրա յօդուածներից (Բիւզանդիոն, 1900), յաճախ յիշատակում է Հաւաքարանս իր «Ազգապատում»ի մէջ: Այն ինչ որ պր. Լևոնեանին նուազ կարևոր թուելով զանց է առած նրա արտագրութիւնն ու հրատարակութիւնը, մեզ, եթէ ոչ պատմական գէթ այլ տեսակէտներով, նոյնքան կարևոր երևեցան որքան նրա արտագրած մասերը: Տեսակէտների այդ զանազանութեան արդիւնքն է ներկայ ամբողջական հրատարակութիւնը:

Խօսքս չկնքած պարտք եմ համարում յայտնել, որ, գործիս տպագրութիւնն իմ բացակայութեան առթիւ տեղի ունենալով, սրբագրութիւնն անձամբ կատարել չկարողացայ և յանձնեցի պ. պ. Սարգիս Չ. Թօփալեանին և Կազրիկ Ներսիսեանին, որոնց սիրալիրութեան հանդէպ յայտնում եմ խորին շնորհակալութիւնս հրապարակով:

ՄԵՍՐՈՊ ՎԱՐԿԱՊԵՏ

1915 թ. Դեկտ. 24

Ս. Էջմիածին

